

დამტკიცებულია: სსიპ - სამცხე-ჯავახეთის
სახელმწიფო უნივერსიტეტის აკადემიური საბჭოს
N 732006 დადგენილებით 23/06/2025წ. ოქმი N 6
საბჭოს თავმჯდომარე, პროფესორი მ. ბერიძე

ლაბორატორიის გამოყენების წესი

მუხლი 1. მოქმედების სფერო

1. ეს წესი არეგულირებს სსიპ - სამცხე-ჯავახეთის სახელმწიფო უნივერსიტეტის (შემდგომში „უნივერსიტეტი“) საკუთრებაში/მფლობელობაში არსებული ლაბორატორიებით სარგებლობის წესს;
2. აღნიშნული წესი მიზნად ისახავს პროფესიული სტუდენტების ჯანმრთელობისა და სიცოცხლის დაცვის უზრუნველყოფას სასწავლო პროცესში, პრაქტიკული კომპონენტის განხორციელებისას, საქმიანობის სპეციფიკიდან გამომდინარე.

მუხლი 2. უსაფრთხოების პრინციპები და მიდგომები

1. უსაფრთხო სამუშაო გარემოს შექმნა პრაქტიკული სწავლების დროს, მათ შორის სწორი ვენტილაციის, განათების და სისუფთავის უზრუნველყოფა;
2. პროფესიული სტუდენტების სისტემური ინფორმირება და ინსტრუქტაჟი შრომის უსაფრთხოების წესებზე და რისკებზე;
3. საშიში ქიმიური პრეპარატების უსაფრთხო შენახვისა და გამოყენების წესების დაცვა;
4. პირველადი სამედიცინო დახმარების ხელმისაწვდომობა სასწავლო სივრცეში.

მუხლი 3. ლაბორატორიაში არსებული ინვენტარის დაზიანება

1. დაუშვებელია ლაბორატორიაში არსებული ინვენტარის დაზიანება;
2. დაუშვებელია ლაბორატორიაში არსებული ინვენტარის ლაბორატორიიდან გატანა პასუხისმგებელი პირის ნებართვის გარეშე;
3. დაუშვებელია, პროფესიული განათლების მასწავლებლის გარეშე, უნებართვოდ, ლაბორატორიით სარგებლობა.

მუხლი 4. ლაბორატორიით სარგებლობის უსაფრთხოების ზოგადი წესები

1. ლაბორატორიის მომხმარებელი ვალდებულია გამოიყენოს სათანადო აღჭურვილობა მისი მოხმარების აღწერილობის მიხედვით.
2. მეცადინეობის მიმდინარეობისას ლაბორატორიის კარი უნდა დაიხუროს.
3. ექსპერიმენტის, ცდის დაწყება შესაძლებელია მხოლოდ პროფესიული განათლების მასწავლებლის მიერ ლაბორატორიულ ამოცანაზე დაშვების მიღების შემდეგ.

4. ლაბორატორიულ ამოცანაზე დაშვების მისაღებად, პროფესიული სტუდენტი პროფესიული განათლების მასწავლებლისგან უნდა გაეცნოს ლაბორატორიული ამოცანის აღწერას და მისი შესრულების უსაფრთხო წესებს.
5. ყოველი ცდის ჩატარების დროს უნდა იქნას გამოყენებული ერთჯერადი ხელთათმანები. ხელთათმანების გადაყრა უნდა მოხდეს ცდის დასრულებისთანავე ლაბორატორიაში განთავსებულ სანაგვე ურნაში.
6. დაუშვებელია ცდის ჩატარება დამცავი სათვალის გარეშე. ქიმიური ცდის ჩატარების შემთხვევაში, საჭიროებისამებრ უნდა ჩაირთოს გამწოვი.
7. სამუშაოს დასრულების შემდეგ ხელსაწყო უნდა გამოირთოს და სამუშაო ადგილი, ლაბორატორია უნდა მოაწესრიგდეს.
8. დაუშვებელია ელექტრულ ხელსაწყოებთან მუშაობა სველი ხელით. დიდი ტევადობის კონდენსატორებთან მუშაობისას აუცილებელია ინდივიდუალური უსაფრთხოების საშუალებების გამოყენება – დამცავი ხელთათმანი, სათვალე და ა.შ.
9. დაუშვებელია ელექტრო ხელსაწყოების არაიზოლირებულ მომჭერებთან დაუცველი ხელის შეხება.
10. თხევადი და მყარი სხეულების გახურებისას დაუშვებელია ჭურჭელში ზემოდან ჩახედვა.
11. დაუშვებელია ლაზერის სხივის ან მისი ანარეკლის მიმართვა თვალში, რადგან ამან შეიძლება გამოიწვიოს თვალის დაზიანება და მხედველობის დაკარგვაც კი.
12. დაუშვებელია ცდის ჩატარების დროს პროფესიული სტუდენტის ან/და პროფესიული განათლების მასწავლებლის მიერ ცდისათვის საჭირო მასალის თვალზე ან პირთან ახლოს მიტანა.
13. ყოველი ცდის ჩატარების შემდეგ საჭიროა გამოყენებული ჭურჭლის გარეცხვა.
14. დაუშვებელია სპირტქურასთან ახლოს ადვილად აალებადი სხეულების (მაგ. ქაღალდი) განთავსება.
15. დაუშვებელია ცდის მსვლელობისას გაცხელებული ჭურჭლის შენახვა მის გაცივებამდე.
16. აუცილებელია მოხდეს თითოეული ინციდენტის ადეკვატური შეფასება, დაწესდეს ზედამხედველობა.
17. ცდის ჩატარებისას, თუ რომელიმე ნივთიერება შემთხვევით კანზე მოხვდება პროფესიულ სტუდენტს ან/და პროფესიული განათლების მასწავლებელს, აუცილებლად უნდა მოხდეს საპნიანი წყლით დამუშავება და უნივერსიტეტის ექიმთან/ექთანთან კონსულტაციის გავლა.
18. ლაბორატორიაში დაცული უნდა იყოს სანიტარული ნორმები.

19. მინის საგნების გატეხვის შემთხვევაში აუცილებელია სასწრაფოდ გასუფთავდეს ლაბორატორია მინის ნარჩენებისაგან.

20. სამუშაო ზონაში აკრძალულია საკვებისა და სასმელის მიღება, პირადი ნივთების შენახვა

21. ლაბორატორია უნდა იყოს სუფთა და მოწესრიგებული. დაუშვებელია ცდის ჩატარების დროს მაგიდაზე განთავსებული იყოს სხვა სახის ნივთიერებები, რომელიც ცდისათვის არ გამოიყენება.

22. სამუშაოს შესრულების შემდეგ ლაბორატორიიდან გასვლის წინ პროფესიული სტუდენტი ვალდებულია დაიბანოს ხელი.

23. ლაბორატორიის კაბინეტთან ახლოს თვალაჩინო ადგილს უნდა იყოს განთავსებული ხანძარ-საწინააღმდეგო საშუალებები.

24. ინფორმაცია უბედური შემთხვევის ან აშკარა პოტენციური დაზიანების/საფრთხის შესახებ დაუყოვნებლივ უნდა ეცნობოს უსაფრთხოებაზე პასუხისმგებელ პირს.

მუხლი 5. გადაუდებელი შემთხვევების მართვა

1. ლაბორატორიაში განთავსებული უნდა იყოს სამედიცინო დახმარების ყუთი და ცეცხლმაქრი მოწყობილობა;

2. პერსონალს უნდა ჰქონდეს გადაუდებელი შემთხვევების მართვის (პირველადი დახმარება, ევაკუაცია) მინიმუმ საბაზისო ცოდნა;

3. ყველა პროფესიულ სტუდენტს მიეწოდება გადაუდებელი ნომრების სია და ევაკუაციის გეგმა.

მუხლი 6. პროფესიული განათლების მასწავლებლის/პროფესიული სტუდენტის პასუხისმგებლობა

1. პროფესიული განათლების მასწავლებელი/პროფესიული სტუდენტი ვალდებულია დაიცვას ლაბორატორიით სარგებლობის წესები;

2. განსაკუთრებული დარღვევისათვის პროფესიული განათლების მასწავლებელს/პროფესიულ სტუდენტს შეიძლება დაეკისროს შინაგანაწესით განსაზღვრული დისციპლინური პასუხისმგებლობა.